



Knud Kleemann
Atassut

UKA 2025/54
13. november 2025

Utoqqalinersiallit tamarmik toqqissisimasumik akilersinnaasamillu angerlarsimaffeqartinnissaat qanoq ililluta qulakkeersinnaaneripput pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Bo Martinsen, Demokraatit)

Qutsavigerusupparput Demokraatineersup Bo Martinsenip apeqquteqaat aallaavigalugu oqallinnissamik sinnersuutaanut soqutiginarluinnartumut.

Atassummiit utoqqaat naleqartitaralutigit politikikkut sullissinitsinni pingaartitaraagut, Inuiattut ilisarnaatigisimavarput utoqqartavut ataqqisarlutigit, misilittagartuut, tunniussaqaarsimasut Nunatsinnut, aammalu kinguaariinnut piorsarsimassutsitsinnut; naleqartitatsinnut; annertuumik ilusilersuisimasut ullumikkumut.

Ukiunut makkununga kinguaariit nikeriarnerannut killippugut 60-ikkunni inuusimasut utoqqalinersiuteqalerlutik aallartisalertut. Ukiut taakku Nunatsinni inunngorsimasut amerlasuujupput, aammalu ilisimavarput utoqqaat peqqinneruleriartortut aammalu ukioqqortusiartortut, tamanna nuannaarutissaraarput aammalu suliassaralugu.

Utoqqalisartut amerliartorneranni Nunatsinni unammillingassatta ilagaat inuiaqatigiinni ilisimannginnatsigu soorlu matumani apeqquteqaat aallaavigalungu oqallisissiami qulequttammi qaqinneqartoq qanoq najungaqariuseqartitsissanerluta utoqqarnut. Ilisimavarpummi utoqqalisartut immikkut pisariaqartitsilersartut sinaakkutinik naleqquttunik, assersuutitut tummeramininnguit unammillernartunngortarput. Aammalu inoqarfinni minnerusuniittut utoqqalisut pisariaqartitsinerat sinaakkutinik naleqquttunik annertusiartortillugu illoqarfinnut nuutinneqartariaqartarput sullinneqarnissaat pitsaannerusumik siunertaralugu, tamanna utoqqalisunut ukiorpassuarni nunaqarfigisimasamut qimatsisariaqartarnek ilaquattanullu uummatikkut oqimaattuuvoq annernartoq.



Pissutsit ullumikkut taamaapput Nunatsinni utoqqalisimasunut atungassarititaasut, siunissamilu sulii unammillernartut nutaajunerusut aqqusaartussaavagut, utoqqaat amerlanerulertussaammata.

Taamaattumik Atassummiit isumaqarpugut Naalakkersuinikkut isumaliuutigineqassasoq ukiuni tulluuttuni Nunatsinni misissuisoqarluni sutigut inuiaqatigiinni naleqqussaaqqittariaqarnersugut, utoqqalisartummi aatsaat taama amerlatigisussaasut naatsorsuutigineqarpoq Nunatsinni. Tamanna assigiinngitsorpassuartigut piareersaateqarfigisariaqarparput, ilisimasariaqarpagullu unammillernartut suut naatsorsuutigisinnaanerlutigit piaartumik maannagaaq, politikkikkut siunnerfeqartariaqaratta tikkuussisumik siunissamut piareersaateqarfigisassatsinnik.

Atassummiit apeqquteqaat aallaavigalugu oqallinnissamik siunnersuuteqartoq Demokraatineersoq Bo Martinsen isumaqatigaarput akissaqassutsikkut naleqquttumik utoqqaat akiliisinnaassuseqarnissaat polikkikkut anguniartariaqaripput, aammalu sinaakkutitigut naleqquttumik aqqissuussinissarput sulii isumaliuutigisariaqaripput, taassumalu aamma saniatigut ukiuni tulluuttuni kaammattuutigaarput politikkikkut tigussaasumik ataatsimoorfigisinnaasatsinnik tunaartaqarnissarput pisariaqavimmat pilersaaruteqarnissaq.

Atassummiit Apeqquteqaat aallaavigalungu oqallisisiamik siunnersuuteqartumut Demokraatineersumut Bo Martinsenimut qujaqqilluta Oqallilluarisi.